

■ COLUMNA

«Ei mavan sigl altare per metter en gl'ani»

ROMAN CAVIEZEL

Bumaun 2021: Eviva las spusas! Pelvair, la PBD e la PCD fan nozzas. Alleluja, fiu artificzial e zutgerins per in e scadin. E nus tuts, l'entir mund, da Müstair a Mustér e da Dialma fin Danis, essan levgiads, è gea la pagliola – sch'ins dastga duvrar qua quest term – stada lunga e hanada.

Però, per dir la vardad, igl è ì piz a cup, propi. Tut pervi da LGBT, savais? Duas damas... ensemen, tuttina... e pir anc maridar, quai n'è tar nus sa chapescha betg in selbstläufer. Ma ils parlamentaris e las parlamentarias federals han fatg guttas cun chau, nunspetgadamain, probabel sut l'influenza dal virus, e, Dieu saja ludà, serrà tut ils eglis, sursigli tut las atgnas sumbrivas, surmuntà tut ils pregiudizis persunals e morals, tgrads cun charezza durant decennis, ed approvà la «lètg per tuts». Precis, er per nossas duas spusas. Grondius, navair? Tge dalletg, la lètg.



Apropos pagliola hanada, as avais er dumandà co che duas valurusas pugnieras, suenter tants onns discussiuns e dispitas, malchapientschas e rivalitads, pon dad in mument sin l'auter emblidar tut, rubas e strubas, per vulair s'amar e s'undrar, en ritgezza e paupradad, enfin a la fin da lur dis? E quai betg forse per interess persunal, maindir electoral! Na, quai è pura amur, diavelen! Ins pudess schizunt dir: amur existenziala. Il meglier mussament è senz'auter il fatg da vulair bandunar tut il passà, bun e nausch, e sa cular cun pel ed ossa, pia en ina spezia da transsub-

stanziazium, en la nova furma da l'allianza dal center ADC (na da scumbigliar cun la partida en Germania cun letras sumegliantas!).

Bun, forse han er lur figls respectivs da l'emprima lètg, il Candi Nas ed il Landi Olt, giugà ina rolla en chaussa. Savais quant cool, duas mammas! Per uschè da dir automatiscamain, senza storscher in det. E tut grazia a LGBT. Nunditg, ma bel.

Basta, uss è damai tut pront per la festa. Nozzas alvas? Castenca, deplorablmain, pervi da la PCD. Ti na pos tuttina betg passar si sco lavina naira durant in tschientaner e lura maridar en alv. Bain cler, gnanc ozendi, en il temp postfactic. Ed ins auda che las duas spusas sajan sa cunvegnidas da desister da messa e predi, per amur da la pasch. Pia nagin «tgaubriechel ch'ei segli'or il tschurvi», jau sun levgià. Ch'ella(s) vivia(n) ditg!

*Roman Caviezel è stà scolast gimnasial.